

Ministar odbrane BiH najavljuje



Jedinica OSBiH bi mogla biti upućena u misiju ISAF u oktobru

Danci će testirati pripadnike OSBiH

Certificiranje pješadijske jedinice OSBiH, koja će u Afganistan, obavice danske borbene grupe

Pripadnici danskih oružanih snaga, u čijem sastavu će se u Afganistanu nalaziti i naša pješadijska jedinica, doći će u septembru u Bosnu i Hercegovinu kako bi izvršili certificiranje vojnika i oficira OSBiH koji će biti upućeni u misiju ISAF.

Od ministra odbrane BiH Selme Cikotića jučer smo doznali da će oni, poslije višemjesečne obuke, biti podvrgnuti testiranju kako bi, nakon što dobiju završni certifikat, mogli biti pridruženi danskoj borbenoj grupi. Tome će prethoditi sjednica Doma naroda Parlamentarne skupštine BiH, koja je planirana za 2. septembar i na kojoj bi trebalo da bude potvrđena odluka o slanju jedinice OSBiH u Afganistan. Cikotić veli da nema naznaka da bi neki od klubova delegata to mogao osporiti. Ocjenjuje da će sve biti urađeno pravovremeno i da će BiH uputiti jedinicu u ISAF prema sadašnjem planu.

Provjera sposobnosti

- Sa danskom borbenom grupom će se precizirati vrijeme slanja jedinice, ali mislim da će to biti u toku oktobra. Može se desiti da to bude i u novembru, ali je vjerovatnije u oktobru, rekao je on.

Tokom certificiranja biće provjerene sve mentalne, fizičke, taktičke i tehničke sposobnosti, kao i kompletnost i opremljenost jedinice da bi ona mogla biti upućena u misiju. Taj posao će trajati nekoliko dana. Ministar Cikotić podsjeća da Bosna i Hercegovina nije bez iskustva u obuci vojnika i oficira za učešće u međunarodnim operacijama, poput ove u Afganistanu i Iraku.

- Mi smo prolazili sve te faze. Imamo iskusne instruktore i kontrolore. Siguran sam da je naša jedinica na nivou veoma visokih standarda i da će proći završnu provjeru, kazao je Cikotić.

Stvari drugačije stoje sa ispunjavanjem uslova za početak primjene prvog godišnjeg nacionalnog plana iz MAP-a. Na sastanku ministara zemalja članica NATO-a u aprilu u Tallinnu, BiH je primljena u Akcioni plan za članstvo, uz uslov da 69 lokacija sa perspektivnom nepokretnom vojnom imovinom u oba entiteta knjiži na državu. Cikotić ne is-

Trebamo pomoć NATO-a

Tokom julske sastanke u Bruxellesu sa čelnicima NATO-a, Cikotić je kao član državne delegacije, koju je predvodio ministar vanjskih poslova BiH Sven Alkalaj, zatražio pomoć od Sjevernoatlantskog saveza kako bi vojna imovina bila uključena na MOBiH. Tim povodom saopštenjem se nedavno oglašio generalni sekretar NATO-a Anders Fogh Rasmussen.

- U ovome i dalje vidim značaj međunarodne zajednice. Posebno potenciram ulogu Sjevernoatlantskog saveza u odnosu na pitanja vezana za NATO, zato što mi nemamo u okviru unutrašnjih kapaciteta mehanizme deblokade. Kada se neka odluka ne može donijeti, u BiH ne postoji pojedinačno tijelo koje se može smatrati odgovornim zbog toga. Iz tih razloga sam tražio da NATO, sve dok se ne izvrši transformacija tog stanja, ima aktivniju poziciju i osigura napredak unutar države BiH na putu prema punopravnom članstvu, jer je to u velikoj mjeri i u njegovom interesu, rekao je Cikotić.

ključuje mogućnost da to bude učinjeno u septembru, kada je krajnji rok, ukoliko se želi u ovoj godini započeti sa realizacijom MAP-a. Ipak, pritom zadržava značajnu rezervu.

U interesu svih

- MAP je u interesu svih naroda, svih pojedinačno državljana BiH i svih političkih partija. Nema napretka jedne cjeline bez napretka države u cjelini. Međutim, partijski lideri u ovom trenutku daleko više vode računa o tome kako će proći na izborima, nego kako će država proći u odnosu na NATO. Bez obzira na to što nemam znakove da je rješenje na putu, iz svoje pozicije radim sve, ukoliko se nekim čudom ta odluka donese, da je odmah primijenimo i steknemo uslove da apliciramo taj prvi godišnji nacionalni plan MAP-a, izjavio je on.

DI. OMERAGIĆ

Komisija Vlade FBiH i organizatori otpora Spisak ilegalaca do izbora?!

- Nezvanično, spisak je skoro pa gotov! Zvanično, nema ni "s" od spiska
- I članovi na top-listi

Nezvanično, komisija Vlade FBiH skoro je pa sastavila spisak organizatora otpora agresoru na BiH. U toku je, objašnjeno nam je, revizija dokumenata koje su osobe što pretendiraju na takav status, dostavile. I, kako saznajemo, dio njih će biti brisan sa spiska budući ne ispunjavaju uvjet kojim se zahtijeva da je organizator otpora u kontinuitetu proveo rat u BiH.

Obaška jedni, obaška drugi

Zvanično, a prema tvrdnjama Martina Franjčevića, člana spomenute komisije i pomoćnika ministra za boračka pitanja FBiH, komisija spisak organizatora sasvim sigurno neće sastaviti do početka izbora u BiH.

"I pitanje je koliko će ta priča za, nadam se novog ministra, biti interesantna. Najprije, taj je posao osjetljiv, teogoban, a kriteriji na osnovu kojih se organizatori stavljaju na spiskove su prilično općeniti, fleksibilni. Ne znam točno koliko je sastanaka komisija u punom sastavu održala, ali znam je da dogovoreno da članovi komisije Bošnjaci rade svoj, a Hrvati svoj spisak. Nemam informacije o tomu u kojoj je fazi sastavljanje spiskova. Ali znam da je bošnjački dio komisije imao nekoliko sastanaka i, sudeći po onome što sam čuo, nisu ni blizu gotovog spiska organizatora otpora", tvrdi Franjčević.



Bašić i Hebib: Na spiskovima koje će i potpisati

Helem, broj organizatora otpora agresiji na BiH ne bi trebalo da je veći od 500 (380 Bošnjaka, 120 Hrvata, op. a). O tome koliko je posao sastavljanja spiskova ove vrste tegoban, govori i podatak da je i rahmetli Alija Izetbegović svojevremeno naložio formiranje slične komisije sa istim zadatkom. Broj organizatora otpora, u vrijeme kad je komisija radila, narastao je na oko pet hiljada. I rad komisije je zaustavljen.

I nedavni pokušaji nekolicine boračkih udruženja, "podebljanih" političarima iz SDA, glede istog posla nisu dali konačne rezultate. Na njihovim spiskovima obrela su se braća i amidžići onih koji su sastavljali spiskove, potom političari poput Sulejmana Tihića, predsjednika



SDA, Izeta Izetbegovića, brata Alijinog...

Moja lista, moj potpis

Zanimljivo je primijetiti kako će članovi Vladine komisije, koja ima zadatak sastaviti spisak organizatora otpora, na koncu i sami biti na tom spisku. Šta više, potpisat će ih!

Tu se ponajprije misli na Omera Bašića, predsjednika komisije, potom Avdu Hebibu, predsjednika Patriotske lige BiH, Dževada Saradinu, ratnog načelnika Bugojna i člana PLBiH, Emina Švrakića, osnivača i predsjednika Zelenih beretki, Senahida Memića, jednog od logističara ARBiH, Abdurahmana Šečića, Irfana Ljevakovića, te Peru Zeleniku i Marina Topića.

A. BEČIROVIĆ

Vlada FBiH o slučaju Đokić

Netačan medijski izlet Monike Mijić

Povodom medijskih istupa zastupnice Vijeća ministara BiH pred Evropskim sudom za ljudska prava Monike Mijić, ured Vlade FBiH za zastupanje i saradnju pred Ustavnim sudom BiH reagirao je jučer saopćenjem.

Iznenadeno smo neprimjerenim načinom medijskog eksponiranja zastupnice Vijeća ministara i iznošenjem netačnih podataka o saradnji zastupnice sa organima FBiH u predmetu Branimir Đokić protiv BiH, u kojem je Evropski sud za ljudska prava donio presudu na štetu Federacije. Iako u korespondenciji s organima Vlade FBiH zastupnica izražava zahvalnost zbog dostavljanja pravnih argumenata i dokumentacije koji su valjani za sačinjavanje zahtjeva za preispitivanje predmetne presude, u medijskim istupima ona iznosi dijametralan stav, stoji u saopćenju.

Dodaje se da zastupnica u svom nepotrebnom medijskom izletu zaboravlja činjenicu da je organima federalne Vlade za sačinjavanje prijedloga zahtjeva za preispitivanje predmetne presude i prikupljanje obilne dokumentacije trebalo tek nešto više vremena od

onog potrebnog Uredu zastupnika Vijeća ministara za prevođenje presude i njeno proslijedjivanje organima FBiH. Bitno je istaći da Vlada FBiH raspolaže institucijama koje u svom radu imaju mnogo duži kontakt s Evropskom konvencijom o ljudskim pravima i praksom Evropskog suda od zastupnice koja zanemaruje činjenicu da bi ishod u predmetu Branimira Đokića vjerovatno bio drugačiji da je poslušala savjet tih institucija i u svom izjašnjenju iz 2007. istakla odgovarajuće prigovore.

Zbog vođenja predmeta na ovakav način i pokušaja umanjenja sopstvene odgovornosti, ured smatra da Vlada FBiH treba da razmotri način buduće saradnje s uredom zastupnika Vijeća ministara, te poduzme aktivnosti kako bi se organima Vlade FBiH omogućilo značajnije učešće u zastupanju u predmetima Evropskog suda u kojima se brani interes Federacije, navedeno je u saopćenju, koje je potpisala direktorica ureda Vlade FBiH za zastupanje i saradnju pred Ustavnim sudom BiH Meliha Mujezinović - Katana.